

清封

建威將軍陳公時彥大  
一品夫人陳母劉太夫

人七秩雙壽序

光緒丙午秋識湘陰陳覲文都督於洪江將詣行省辭軍寄乞  
養二親予灑然異之來靖州入軍壘見井幹庖漏秩然環營值  
柳修畦眈釐然其士卒佼壯習勤器甲犀利益知非苟於從事  
者及居稍久時時與論家世瑣事行身準繩乃深見至隱有非  
他人所能及者覲文嘗謂予曰年十五從軍二親泣別諭之曰  
家雖貧不受一錢非義之奉謹身致用勿貽親憂誌之不敢忘  
杖策西行投左文襄營積官至都司始歸娶不知游宦紛華也  
後從陶勤肅公於關內率新軍戡定北大通多巴窮劉四伏於

羅卜淖爾無役不從跨馬蹕八百里髀肉爲創陶公撫之而歎  
擢補肅州左營遊擊辛丑乞養歸里積貲二千分貽昆弟不敢  
有一毫私以違親訓也予驚曰此儒者律身之學制勝於心何  
有於三軍吾鄉陶勤肅公少爲當湖之學以程朱爲歸自諸生  
以致開府終其身一節不可干以私而覲文之爲人不遺親可  
信也今年八月封翁暨德配劉太夫人七旬雙慶一軍之士謀  
觴侑之詞於予且言曰封翁世農年七十五謙約好施予精力  
彌健太夫人操井臼佐家計年七十尙勤績勿怠撫四子各勤  
一業兄弟負薪養親必檢視精密不令山有槎斲欲欲然恐斧

斤之有損於物都督在西陲二十餘年內稟家誠百慮一心如在闔域厯筦新軍砲隊肅州步隊宣威軍甘肅習竄敵都督過黃河自誓曰若有喪名敗行虛籍冒餉者不渡此河故能搏戰關內外所向有功嘗有忌者齷之卒無可捃摭而當道益倚信之在伊犁南山寒冰之谷捐新資設腰頓於是南至八城若過枕席無遼隔之患又開溫宿疏勒煤礦中衛新渠皆底於成癸卯粵事起湘邊警時都督家居趙次帥延致之委以一面之任未幾柳州兵變懷遠告陷氛逼古宜都督從靖州進師產口越湘界三百里扼賊之吭狂辭訖不得逞事平奏擢副將又曰都

督治兵如治稼去惡務盡植善惟勤在靖州三年懲匪賞募悉  
出私財軍民用和非封翁太夫人諭教之勤積累之厚曷克臻  
此予謂諸君與都督同甘苦若匠石引繩不失尺寸其言足信  
並就予所聞知者差次其詞以爲壽謹序

賜進士出身湖南靖州知州愚姪金蓉鏡拜撰